

Uru ngai etikirighi Pol ghe pitiela ta **Taetas** **Inangari emuemua**

Taetas kateva namuu tale ale manga atoa tale patunganua ateva eKrit. Nongina Pol ghe pitipitila ta Timoti, ghe mene piti teela inangari niloeloe ta Taetas tale voto tale ale manga, nongina elda ngatoa me rikina atoa. Me tee, ghe auliaala va Taetas eposo parasi inangari koronna, me ghe aakorokorongana Taetas tale niaiesoaa ghulughuluena tale ale manga, niuungu, me tau-mattu tale kosa ateva oia.

Tani kila amuemua

Aitiutiu tale inangari 1:1-4

Namu ngatoa tale ale manga 1:5-9

Lo atoa la apasunga voto kamena eKrit 1:10-16

Nitoka manga 2:1-10

Liue nitoka tani manga 2:11-15

Vaalua tani toka tee mene katoa taumattu 3:1-
11

Nimasimasi me airuuruu 3:12-15

¹ Aghi, Pol, kapuna tau ngai uungu ieghi God, me kapuna apostolo ieghi Iesu Karisto:

Ghe sungieghila tani laa ghasarasarakana uneira niaikaiaa kapuna taumattu ngatoa God ghe suitoongainilala, tani apasunga salana koronna, eaapasunga vaalua tani toka tale aaloannaane God.

² Ia oia inangari eteva koronna ia, egheeleita ita aatoka tuutuliita tale maulue ateva tokatoka liu ia. God ghe aulia ngalokoiela etaira tale inangari nialokoi emua arau, me auena kosa ateva ghe lutula. Ia karika erooroo tani kamekame.

³ God, ia tau ngai asaangiita ia, ghe apasunga ngaotula ia oia inangari eteva koronna ia tale nauna tuunga ateva ghe suitoongainiela, me ghe taue mae sio etaghi me ghe aulia ngasarasarakanala etaghi tani ppooainia.

⁴ Apitipiti atu etam Taetas, io natughu tuungi io elome tale niaikaaiaa italu uunusi. Alooloo sae va maamasinaane me luei kannia God Tamaita ia, me Karisto Iesu, tau ngai asaangiita ia, aue etoka etam.

Uunguaa Taetas eKrit

⁵ Aghe kasu vuliola eKrit va ughelei kasina voto karika ita ghe ruula, me usui elda ngatoa tale ale manga, tale kateva kateva masaliki taatara, nongina aghe auliaa tau aatu sio.

⁶ Elda ngatoa gheeleiaaira etani masinaaili, karika mene righi sesa gheeleiaaira, me vausenirira ekateva nonga, me natuira atoa la nongo usilainila, la rau mene amakatakata me la tau nissakeaa ila.

⁷ Ta lo ateva eaitaraa uunguaane God tale ale manga karika mene righi sesa gheeleiaane. Erau mene ue va ia nonga namuu ia, me etau nisessa ia. Erau mene tau niropi sesa manu, me ealona tani aiuvii, erau mene kuruetu tale viliki veu.

8 Me ia o taumattu ngateva eaikoloa taumattu me eaitarainila nau la lao tanganuena. Me eailousiaa saa voto masina, me enanna ngamasina, me eghulughuluena, me eraarangisana, me eitaraa nannaane me gheeleiaane.

9 Eposo parasi inangari koronna, nongina ami ghe apasungaala me erooroo tani aisausiaa mene katoa tale koronna niapasunga, me erooroo tani kiso lo atoa la sessa tee inangari koronna.

10 Poli aue eoroieili taumattu ngatoa aue la tau nissakeaa me tau ni-nim sama ila me tau nikamekame ila, tani ila o lo atoa la aasarasarakana uunguaa ni-isoiso.

11 Uauliaa etaira va karika la mene apasunga, poli ngila ghe gheleila katoa taumattu me tee natuira atoa tale kateva kateva ale, ngila ghe oghi vulula inangari koronna, laghe nim gheelei isaa o niapasunga tani ghaa uneira viliki veu.

12 Kateva taumattu eKrit la ghe kolokoloa va propete ia ghe uela va, “Taumattu nge Krit atoa, tau nikamekame ila. Ila nongina sesa ghaata kkena atoa, mangoona ila, me tau ninamanama ila.”

13 Isaa o inangari koronna. Liuna avalua o me uppooa inangari sarasarakana etaira, me aue la roo tani sarasarakana tale uneira niaikaaiaa.

14 Me la rau mene tau lao nannaaira tale kaluira kiukiu marripana aJiu etoa, me inangari lo atoa la liuliu viliira tale inangari koronna la poppooa ngasarasarakana.

15 Lo atoa urunguitaniira raarangisana, voto

1:10: 1 Tim 4:7.

1:11: 1 Pita 5:2; 2 Tim 3:5-6.

1:13: 2 Tim

4:2. **1:14:** 1 Tim 4:7.

akapa etaira raarangisana, me ta lo atoa urunguitaniira karika raarangisana me karika la aikaaiaa, karika righi voto etaira raarangisana, tale isaa akapa ninannaa karika la kilakila eaa sesa me eaa masina.

¹⁶ La ue va la kilakila God, me gheeleiaaira eaapasunga va karika la kilakilaia, ila mauuna ila, karika la roo tani nongo usilaa, me karika muenna ila tani ghelei niuungu masina.

2

Inangari tani apasunga tale asease taumattu

¹ Me io uapasunga voto koronna elaoalo aitauaa tee koronna niapasunga.

² Uauliaa ta taita namu ngatoa va la aitaraa tokatokaaira, me uunguaaira, me aippooaaira, me la nanna ngamasina. La tani ghulughuluena tale uneira niaikaaiaa, me niaealousi, me la tingina akorokorongana eghaa nau eruu.

³ Me tale ia nonga o salana atikirighi, uapasunga ta vause namu ngatoa, tani apasunga va la oneoneaa God. La rau mene kasu see tani ghelei saasakiaa ta mene katoa tale inangariira, me la rau mene toka aloanna tani toka ropiropi sesa manu, ta la apasunga ta katoa saa voto masina.

⁴ Liuna avalua o me ila o vause namu ngatoa la apasunga ta llo vause aviri laghe laila, tani ailousia taitaniira atoa me natuira atoa,

⁵ me la nanna ngamasina, me la raarangisana, me tani masi vause tani aitaraa paa ngale, me tani aisausiaa, me tani oneoneaa taitaniira atoa, me

aue karika teva eppooaa saasakiaa tale inangarina ateva God.

⁶ Me tale ia nonga o salana atikirighi, uapasunga tee tale llo taita aviri laghe laila, tani nanna ngamasina

⁷ tale voto akapa. Me io uapasunga nonga masi voto. Urau mene usimaghluu nau uapasunga, me uapasunga tale masi ninannaa me nioneoneaa,

⁸ me utani apasunga nonga koronna tana inangari, me karika teva aue eauliulieinio. Arova ughelei evalua o, tau ngai ssateem atoa karika aue la ghauliaa teeio righi voto, me aue la palata.

⁹ Uapasunga ta tau ngai uungu etoa karika la tokatoka tale aloannaaira va la nongo usilaa kapuira namu ngatoa tale isaa akapa voto. Me la tau lao nannaaira me sarasarakaniaaira tani ghelei voto erooroo tani ghelei emasimasi kapuira namu ngatoa, me la rau mene ssakeainila.

¹⁰ La tani apasunga va la rooroo tani atoka tuutuliira etaira tale isaa akapaaili voto la ghelei me karika la ainao peiira, me aue la oneoneaa inangarina God tau ngai asaangita ia.

*God eaalona akapa
taumattu ngatoa
tani saanga*

¹¹ Poli maamasinaane God ang ghe kauerekatila, eaasaangi taumattu ngakapa atoa.

¹² Eaapasunga etaita tani ue va “karika” tale voto karika ita oneoneaa God etana me sesa voto kosa ateva ealoanna, me ita nanna ngamasina,

ita ghulughuluena, me ita oneoneaa God tale tokatokaaita tale nau etiulu oia,

¹³ nau ita toitoi esasararakanaaili masi nau eteva nau kapuita Goto ateva me tau ngai asaangiita ateva Iesu Karisto emae tale sarasarakaniaane me mallangina ateva.

¹⁴ Ghe taue mae sio etaita tani għħa oghita tale isaa akapa sesa voto me tani għelei eraarangisana taumattu va etani kapunaaili ila me la ghannaaili tani għelei masi niuungu.

¹⁵ Me isaa toko voto utani apasunga. Uaippooaa teeila tani asarasarakanaila me ukisoila tale inangari matuutuliena. Urau mene tau velu teva va etara aloio sio euu.

3

Tani għelei voto masina

¹ Umene auliaa ta tau ngaisesa ngatoa va la oneoneaa lo atoa la muemueinila me matuutuliena ila me la tani nongo usilainila me la ghaimonomonosiaa tani għelei masi niuungu,

² me tani rau mene ppooaa saasakiaa tee kat-eva, me tani rau mene aikiso, me tani nnāa mene kateva, me tani siuua nannaaira tale isaa akapa taumattu.

³ Poli ita tee tale nau too ang għe lao sio, alokapakapa ita me karika ita għe nongonongo usilaa me lagħe kametala me ita għe nim uungu tale ase niateateaa sarasarakanaili me ase nimasimasi. Ita għe tokatoka tale ninannaa tani għelei saasakiaa kateva me tani sessaita ta lo atoa

2:14: Gal 1:4; Eks 19:5; Diut 7:6; Esik 37:23; 1 Pita 2:9. **2:15:** 1 Tim 4:12. **3:1:** Rom 13:1-7; 1 Pita 2:13-14. **3:3:** 1 Ko 6:9-11; Ips 2:1-2; 5:8.

peiira me uunguaaira me ita karika. Laghe sessa teeita me ita, ita ghe sessa tee mene katoa.

4 Me nau masi aisausiaane me aielousiaane God tau ngai asaangiitila ia ghe kauerekatila,

5 ghe asaangitala. Karika va tale voto ghulughluena ita ghe gheelei ta poli aalousiusiaane, ghe asaangitala tale nisuusuu tale nilutu aouna me nighelei aouna kanna Spirit Manga ateva.

6 Poli Iesu Karisto ghe matela etaita tani asaan-gita, God ghe tau sio mae Spirit Manga ateva etaita, me karika ghe ghaa oghiela.

7 Me nau God ghe ghelei eghulughuluensaitala poli maamasinaane, ita, ita rooroo va ita ghaa voto ita taatara lao etana tale maulue ateva tokatoka liu ia.

8 Ita aatoka tuutuliita tale isaa oia inangari. Me aghanna va utani aulia ngakorokorongana isaa oia voto me lo atoa la ghaaiesoaa ta God, la ainanganangaa tani taula lao tani ghelei masi ni-uungu. Isaa o voto masinaaili me esausi taumattu ngakapa atoa.

9 Me uakekkeliu tale nisama alokapakapanna me kiukiuiira me tuvura atoa me niaisoa me niaik-iso tale inangari tale uunguaa inangari nipaopao. Poli isaa o voto karika aue esausi taumattu, me nim kamena.

10 Uauliaa kiena lo ateva taumattu eaatoka apolapola taumattu. Uauliaa katengaata etana, vara me umene auliaa ghaluene etana. Nau uruu, urau mene ghelei mene righi llo etana.

11 Aue ukilaaili va ia o ase taumattu ngateva

sesa ia me tau ssavoto ia me gheeleiaane eaapsunga aotu va sesa taumattu ia.

Airuuruu tale inangari

¹² Nau eteva asuu aatu Atemas o Tikikus etam, utootoonga ngakapa ase salana tani mae taraieghi eNikopolis, poli aghanna tani toka oia eNikopolis nau nikkaili me kuukuu eteva.

¹³ Ughelei saa llo voto urooroo tani ghelei tani sausi Senas loeaa ia me Apolos tale kasuksuaairarua me karika lalu mene tukuna tale voto lalu aanna.

¹⁴ Me tee, kapuita taumattu ngatoa la tani ghaa alomasaanga tani taula lao tani ghelei masi niuungu, me ue la rooroo tani tau lao voto ta lo atoa la aloanna niaisausi, me la rau nim mene toka me karika la ghelei righi voto.

¹⁵ Ila akapa lo atoa la tokatoka teeieghi la suu atu sio masimasiaaira etam. Am amasimasi lo atoa la ghailousieinamami tale niaikaaiaa.

Alooloo sae va maamasinaane etoka akapa etaimim.

3:12: Ips 6:21-22; Kol 4:7-8.

3:13: Apos 18:24; 1 Ko 3:5-6.

3:14: Ips 4:28.

**Mussau-Emira Bible
Portions of the Holy Bible in the Mussau-Emira
Language of Papua New Guinea
Sampela hap Buk Baibel long tokples Mussau-Emira
long Niugini**

copyright © 2006, 2008, 2013, 2016, 2018 Wycliffe Bible Translators, Inc.

Language: Mussau-Emira

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-09

PDF generated using Haiola and XeLaTeX on 28 Dec 2024 from source files dated 13 Dec 2023

9cadc943-c245-5983-a663-5b2655bf0449